

# GOCCIUS DE SU GLORIOSU MARTIRI SANTU SISINNI

Bosu, o Martiri sagrau,  
Grazias po nosu ottenei:  
Rjt.: *Is devotus defendei,*  
*Sisinni Santu Abogau.*

*Nasciu seis in Eleni*  
*Bella e fiorida Zittadi;*  
*Su Battisimu, summu beni,*  
*Arricendi cun piedadi,*  
*Sa Stola de santidadi*  
*Heis intatta cunservau.*  
Rjt.: *Is devotus...*

*De sa primu gioventudi*  
*Predichendu cun fervori,*  
*De dogna santa Virtudi*  
*Diffundeis su splendori:*  
*De sa fidi a defensori*  
*Os'hat Deus destinau.*  
Rjt.: *Is devotus...*

*Fervorosu Evangelista*  
*Po unu zelu tant'ardenti,*  
*Fait mirabili conquista*  
*Sa boxi bosta potenti;*  
*Curvertendu meda genti*  
*De su populu incantau.*  
Rjt.: *Is devotus...*

*Candu intendit cun rancori*  
*Sa dottrina predicada,*  
*Andat in ira e furori*  
*Su tirannu chi regnada,*  
*Cun manera scellerada*  
*Seis istetiu catturau.*  
Rjt.: *Is devotus...*

*Strascinau a sa presenzia,*  
*Strintu de fortis cadenas,*  
*Os'intimat sa sentenza*  
*De morti, e atrocis penas*  
*Si is Deidadis oscenas*  
*No estis subitu adorau.*  
Rjt.: *Is devotus...*

*Ma bosu s'impriu deliriu*  
*Cun custanzia disprezzais:*  
*Tanti barbaru martiriu*  
*De bonu animu abbrazzais:*  
*E sa fidi sigillais*  
*Cun su sanguini sagrau.*  
Rjt.: *Is devotus...*

*Po Gesusu suffreis sa morti,*  
*Cali vittima odorosa;*  
*A sa sempiterna Corti*  
*Bolat s'anima dicioza,*  
*Aundi regnat gloriosa*  
*In su soliu meritau.*  
Rjt.: *Is devotus...*

*Fei, benignu Protettori,*  
*Po is preghieras chi osi feus,*  
*Chi fidus a su Signori*  
*Sa vita nosta passeus*  
*E ch'in su Celu goseus*  
*De su premiu sospirau.*  
Rjt.: *Is devotus...*

*R. Ora pro nobis Beate Sisinni V. Ut digni efficiamur promissionibus Cristi.*  
**OREMUS**

*Praesta, quaesumus omnipotens Deus, ut intercedente Beato Sisinnio Martire tuo, et a cunctis adversitatibus liberemur in corpore, et a pravis cogitationibus mundemur in mente.*

*Per Cristum Dominum nostrum.*

*R. Amen*